




Senin, 16 November 2020
Ogen: Yakob 1:26-27



Agama Si Tuhu-Tuhu



Negaranta ikataken Negara si eragama, pendudukna kerinana lit agamana. Janah kerina agama e lit kebenarena. Enggo jadi sada aturen bas negaranta lako ngergaken ras mehamat man agama si deban, nggeluh rukun dingen la si pandang-pandangan. Tapi uga kinatana? Megati si begi i bas piga-piga daerah lit perubaten erkiteken agama, jabu pe lit rubat erkiteken agama. Si e terjadi erkiteken agamanta e si akap si payona, agama kalak la payo. Wari enda ibabai kita uga kin agama si tuhu-tuhu?

Agama si tuhu-tuhu la terjeng teori, la terjeng reh ku rumah pertoton lako rende ras muji-muji Dibata, la terjeng i bas babah puji-pujin e tapi rikut ras perbahanen. Si eragama alu payo ijagana dilahna, ertina, banci ukuasaina dirina. La ibelaskenna kata guak, entah penebu-nebu, la ibelaskenna kata kata si erbahansa kalak rubat. Belaskenna kata si payo, kata tuhu, kata kebenaren erpalas ku kata Dibata. Kalak si tutus ersembah ku rumah pertoton, pengeranana pe mehuli, sikap man beginken ras idalankenna sue ras kata Dibata . Tutus er agama tapi la teridah pengajaren e arah perbahanenna si teptep wari e gelarna perbual. Agama si tuhu-tuhu, ermediate ku sekelewetna, ietehna apai teman si man sampaten, ras isampatina. Umpamana, nampati anak-anak si enggo melumang ras diberu si enggo mbalu si lit i bas kiniseran. Paksa Jakobus nuliskan surat enda, teridah man bana maka anak melumang ras diberu si enggo mbalu e golongan si perlu isampati sebab lalit hukum si mere perlindungan man bana. Masyarakat sekelewet pe la emperdiatekensa, sebab labo ngasup ia ersemulih di kune pe isampati. emaka, si bayak nge isampati gelah pagin pe banci ka kita isampatina. Emaka nina Jakob, agama si tuhu-tuhu eme nampati kalak si la ngasup ersemulih man bandu, ermediate man kalak si labo pernah ermediate man bandu. Tupung isampatindu kalak si kitikna kal, Dibata kap si isampatindu e. Adi nampati, labo si pernehen kai agamana, entah suku kai ia. Agama si tuhu-tuhu, njaga dirindu gelah ula icedaken doni enda. Doni si jadi symbol kegelapen ras dosa. jadi si jaga dirinta gelah ula bengket ku bas perbahanen dosa; egois, erbual, melasken kata guak, perjabu tengah, cikurak, cian, erelem-elem ras sidebanna. Perlu si inget maka kita enggo sekerajangen Dibata. Tuduhkan dage arah kerina lagu langkahta.